

# MPP salahkan sikap pelajar IPT

Oleh NOR SHAFAWATI YUP  
berita@kosmo.com.my

KUALA LUMPUR – Majlis Perwakilan Pelajar (MPP) beberapa universiti tempatan menyalahkan sikap pelajar sebagai punca duit Perbadanan Tabung Pendidikan Tinggi Nasional (PTPTN) digunakan untuk tujuan yang tidak sepatutnya seperti membeli motosikal dan telefon bimbit mahal.

Presiden MPP Universiti Kebangsaan Malaysia (UKM), Nasir Mohamed Ali berkata, perbuatan itu kerap melibatkan pelajar yang mempunyai latar belakang keluarga kurang berkemampuan.

“Apabila mereka dapat wang tambahan daripada PTPTN, mereka mula membeli barangan yang selama ini tidak mampu dibeli.

“Bila habis duit pada pertengahan atau hujung semester, barulah mereka sedar dan mula mengikat perut dengan hanya makan mi segera,” katanya ketika dihubungi semalam.

Menurut Nasir, ada juga pelajar yang menyalahgunakan wang tersebut kerana terpengaruh dengan rakan untuk bergaya ketika ke kuliah.

Tambah Nasir, kesedaran dalam diri setiap pelajar merupakan aspek yang paling penting dalam menguruskan wang PTPTN.



## KERATAN Kosmo! semalam.

“Wang PTPTN yang diberikan oleh kerajaan seharusnya digunakan untuk tujuan pengajian,” katanya.

Menurutnya, di UKM, kempen kesedaran mengenai penyalahgunaan wang PTPTN telah dijalankan oleh kolej-kolej kediaman dan juga fakulti.

Yang Dipertua MPP Universiti

Putra Malaysia (UPM), Mohd. Syamsul Salleh pula berkata, sikap pelajar itu dipengaruhi oleh kejutan budaya yang mereka alami di kampus.

“Ketika masih bersekolah, mereka meminta wang daripada ibu atau ayah tetapi apabila di universiti, wang pinjaman PTPTN dimasukkan terus ke dalam akaun dan menjadi duit sendiri.

“Sistem itu menuntut setiap pelajar pandai menguruskan kewangan dan tidak menghadapi masalah di kemudian hari,” katanya.

Syamsul memberitahu, apa yang berlaku bukan perkara baru dan semua pihak harus mengambil tin-

dakan secara berterusan untuk menangannya.

“Di UPM kami ada kempen ‘Satu Hati Satu Inspirasi’ untuk mewujudkan kesedaran di kalangan pelajar terutama dari segi tanggungjawab sebagai seorang mahasiswa dan mahasiswi,” tambahnya.

Sementara itu, Yang Dipertua MPP Universiti Malaya (UM), Mohd. Ridzuan Mohammad berpendapat, amalan boros itu selalunya membabitkan pelajar baru.

“Kesilapan mereka ialah melihat wang pinjaman itu sebagai duit belanja tanpa memikirkan kegunaan lain seperti membayar yuran dan membeli buku,” ujarnya.